

KAOMININA IMITO FANDRIANA

Nizara fitaovana samy hafa ho an'ireo fokontany 22

Andro niavaka ho an'ny Vahoaka any Imito, distrikan'i Fandriana faritra Amoron'i Mania ny zoma 1 aprily 2022 lasa teo. Notanterahina tamin'io Taombavao Malagasy io sady andro tsena ao an-toerana rahateo, ny fizaran'ny Kaominina fitaovana, ho fampitaovana ireo Fokontany miisa 22 mandrafitra ity Kaominina iray, ao anatin'ny Distrikan'i Fandriana, Faritra Amoron'i Mania ity. Simenitra amin'ny kitapo, hazo « madrier », hazo fanaovana valindrihana, fanitsy, «panneau solaire », takamoa, penina, penisily hazo, taratasy, seza, latabatra, loko, vola ... no nozaraina. « Vola madiodion'ny Kaominina no nenti-nanana ireo fampitaovao ireo, ho famaliana ny fangatahan'ny Fokontany araka ny filan'izy ireo tsirairay avy », hoy Raza-fimanantsoa Andriatsiravana Jean Marie, Ben'ny tanàna sady mpahay toekarena. Fanambin'ity farany ny hitondra fomba fanao vaovao amin'ny politika. Izy izay nanipika mazava, fa « azo atao ny mampandroso miainga amin'izay eo ampelan-ta-



Ny fanolorana fitaovana samy hafa ho an'ireo fokontany, nataon'ny kaominina Imito any Fandriana.

nana ». Mavitrika amin'ny fandoavan-ketra ny mpoin'Imito ary efa nahazon'ity Kaominina ity loka izany. Mendrika hisitraka tamberin'andraikitra ny mponina ho setrin'izany, hoy hatrany ny Ben'ny tanàna. Porofon'izany izao fampitaovana hitondra fampandrosoana eny ifotony, miainga amin'ny Fokontany izao. Izany dia natao teo anatrehan'ny Vahoaka notarihin'ireo Sefo Fokontany rehetra. Kaominina voafidy ha-

nombohana ny tetikasa « Asa Avotra Mirindra » i Imito ao anatin'ny Distrikan'i Fandriana. Tia mampiana-janaka ny mponina ao ary isan'ny mitana ny laharana voalohany hatrany amin'ny taham-pahafahana bakalôrea ao amin'ny Faritanin'i Fianarantsoa. Niverina ny famatsiana rano ao Imito raha tapaka an-taonany maromaro, mirehitra jiro ny tanàna ankehitriny. Hanana «gare routière » manarapenitra ihany koa

Imito, izay ezaky ny Kaominina madiodio, hanalana fahasahiranana ireo mpandeha. Efa vita ny trano, fa fanadiovana no sisa. Mitana ny teto Fahizay, miavaka amin'ny firaisankina ihany koa ny Vahoakan'Imito. Maro ny asa vita tao anatin'izany, ary iantsoan'ny Ben'ny tanàna ireo zanaka ampielezana hifanome tanana ho fampandrosoana ity Kaominina Imito ity.

Isambilo

Ecforme Azo atao ny miady amin'ny fanandevozana ho an'ireo mpiasa mpifindra monina

Nanolotra tetikasa ahafahana manangana "Centre de ressource", ho an'ny mpiasa mpifindra monina, sy ho an'ny olona mitady asa any ivelan'i Madagasikara ny Ecforme (Etudes conseils formations entrepreneurs), mba hisorohana ny fanambakana sy ny fanandevozana ary ny fanararaotana arak'asa. Nilaza Ramatoa Andrianasolo Hoby, Talen'ny Ecforme, fa ny tsy fahafantarany mpiasa ny lalàna mifehy ny asa sy ny zon'ny mpiasa, no mahatonga ny mpiasa mpifindra monina voasolofiny, hany ka tsy misy fivoarany ny fiainany rehefa miverina aty an-tanindra-



Atrikasa, nataon'ny avy amin'ny Ecforme.

zana. Nanamafy ny talen'ny Ecforme, fa tokony hampahafantarina ny olona hiondrana any ivelany ny lalàna mifehy ny asany, ny andraikiny, ny zavatra nifanarahana amin'ny mpampiasa sy ny

zavatra tsy maintsy hatony rehefa mitranga ny olona arak'asa ary amporisihana ireto farany, mba ho sahy mitaky ny zony amin'ny mpampiasa, mba hisorohana ny fanit-sakitsahana ny zony. An-

koatra izay nilaza Ramatoa Andrianasolo Hoby, fa tokony ho voafahin'ny mpiasa ny asa izay hataony, izany hoe efa ampy fiofanana ara-tekhnika, manana fahaizamanao, nahavita fianarana, mba tsy ho diso fanantenana ny mpampiasa azy. Nanohy fanazavana ny Talen'ny Ecforme, fa mila fiaraha-miasa amin'ny mpisehatra miankina, na tsy miankina amin'ny fanjakana ny fanatsarana ny tontolon'ny mpiasa mpifindra monina, mba hampihenana an'ireo mpanararaotra, izay manitsakitsakitsa ny zon'ny mpiasa.

Franck Razakambelo

FJKM Ambatomahamanina Mahatoky Eo am-pamitana ny tranon'ny mpitandrina

Nisongadina nandritry ny alahadin'ny zana-piangonana Ambatomahamanina Mahatoky, syndamparitariy larivo avaradrano ny alahady lasa teo faha ho vitaina ny tranon'ny mpitandrina amin'ny fanamarihana ny faha-25 taonan'ny mpitandrina Rahasinarivo Tianahari-

solo Stéphane Albert mianakavy. Efa vita ny trano fa famitana ny sisa toy ny fametahana ny jiro sy ny kojakoja samihafa. Nambaran'ny filohan'ny komitin'ny fankalazana fa tanjona ny fanomezana zavatra tsara ny mpitandrina noho ny fiaraha-miasa nandritry ny 18

taona teo amin'ny mpino kristianina sy ny mpitandrina mianakavy. Raha tsiahivina, dia nisy ny het-sika tamin'ny alalan'ny valopy sy rakitra notanterahina teny an-toerana ary tratra ny tanjona amin'ny ankapobeny. Nanolotra synthétiseur sy micro ho an'ny fiango-

nana moa ny zana-piangonana Ambatomahamanina Mahatoky noho ny faha-75 taona nijoroan'izy ireo. Nanamafy ny filohan'ny mitohy hatrany ny fiaraha-miasa amin'ny fanohanana ny fiangonana reniny.

Rajo

Printsy Andry Rodrigue « Vahaolana ny fiverenana an-doharano »

Manoloana ny olana isan-tsokajiny zakain'ny vahoaka Malagasy ankehitriny, izay miseho amin'ny endrika fahantrana lalim-paka eo ampiatrehana ny fiainana dia nivoaka tamin'ny fahanginany ny Printsy Andry Rodrigue. Antso avo miendrika vahaolana, araka izany, no nataony ny tokony hiverenan'ny Malagasy tsy ankanavaka (Mpitondra sy Vahoaka), ho amin'ny fanomezan-kasina indray ny Soatoavina malagasy navelan'ireo razambe izay antoka hampirindra indray ny fiainam-piaraha-monina eto Dago. Io ilay hoe : « Fiverenana an-doharano », hoy ny Printsy Rakotoarisoa Andry Rodrigue nanantitra. Anisan'ny efa fizarana ho amin'izany « fiverenana an-doharano » izany, hoy hatrany ny Printsy Andry Rodrigue ny fankalazan'ny Ambanilanitra tsy ankanavaka ny « Taombaovao malagasy » sy ny fanomezan-kasina azy indray. Ny « Taombaovao malagasy » izay raha atao indray mielatra dia fotoana hamitranana ny fihavanana marisarisa na efa tapaka mihitsy, fifamelana, fampanjakana ny firaisankina ary famalonana tantaraka ireo rehetra tsy nety (Ratsy) vita nandritra ny taona, ka hametrahana fijery vaovao, mba hahafahana manatratra ny taona zina ho henika fahombiazana ary ho lavitry ny disadisam-piaraha-monina sy ny fitsitokotokana noho ny hevitra tsy mitovy na fiaviana. Raha tanteraka ireo, handroso i Gasikara fa tsy tahaka ny misy ankehitriny, izay toa fampiesonana sy fampatoriana mitsangana amin'ny alalan'ny fampantanana poakaty lavareny laroana lainga tsara lahatra heheziny akoho token'anaka no iainan-dRamalagasy, izay fadiranovana tanteraka noho ny fahantrana niniana novolena.

Lalaso Razafindrakoto



Ny Printsy Andry Rodrigue, saropiaro tanteraka amin'ny Soatoavina malagasy.

Tetezan'Ampasika Andro maromaro tao aorian'ny fahasimbany vao vita

Andro maromaro lasa izay no nisy fahasimbana ny fehy vy amin'ny tetezan'Ampasika. Andro maromaro tao aorian'izany fahasimbany izany vao vita ny arofanina tamin'ity tetezana ity. Vokatry ny lozam-piarakodia nitranga teny noho tsy fitandremana no anton'ny fahasimbana. Niongotra tanteraka ilay fehy vy voadona ary babangoana ny teo nandritry ny andro maromaro. Anisan'ny adihevitra ny olom-pirenena ny fanontaniana ny momba ny fanamboarana azy sy ny fotoana namitana izany. Iza ihany koa no tokony hanamboatra amin'ireo tomponandraikitra. Mandrapahatonga ny fotoana namamboarana azy dia tady kely iray no napetraka teo. Izany ve dia nahavita inona amin'ny fiarovana ny olona na ny fifamoivoizana eo. Efa misy fehy aza mbola misy miakatra sy mitsoraka hamono tena ihany amin'ireny tetezana ireny, mainka fa tsy misy. Na ny sotasota sy hetraketraka ataon'ny tsy matahotody koa aza mety hitranga amin'izany. Tsy tokony ho adinoina fa faritra mena amin'ny asan-jiolahy iny faritra Ampasika iny. Eo ihany ny lafiny amin'ny hoe fananana iombonana itony tetezan'Ampasika itony, fa ny voalohany aloha dia ny fiarovana ny olom-pirenena, ny mponina sy ny fiarakodia mifamezivezy andro aman'alina eo. Aleo misoroka toy izay mitsabo. Tsy tokony ho nandrasana fotoana ela ny fanarenana azy. Fehy vy efa vita tsara iny, nisy fahasimbana indray noho ny tsy fitandremana.

Radafy